

Siunnersuummut nassuiaatit

Nassuiaatit nalinginnaasut

1. Aallaqqaasiut

Nunaoil A/S-imut siunertaavoq ikummatissiassanut akuersissutini kiisalu Kalaallit Nunaanni aamma Kalaallit Nunaata avataani suliassani tamatumunnga atatillugu pissusissamisoortutut inissisimasuni Namminersorlutik Oqartussat peqataanerisa isumagineqarnissaa, takuuk § 1 Nunaoil A/S pillugu Inatsisartut inatsisaanni.

Naalakkersuisut ulloq 24. juni 2021 aalajangerput Grønlandshavet-imi sumiiffinnut ikummatissiassanut akuersissutiniq tunineqarnissamik qinnuteqaateqaqqusinissaq (neqeroortitsineq) maannamuugallartoq kinguartinneqassasoq.

Taamaalilluni ikummatissiassanik misissuinissamut qalluinissamullu akuersissutiniq nutaanik tunniussisoqartussaangimmat, ingerlatseqatigiiffiup ikummatissiassanut akuersissutini peqataanissamik siunertaqartup attatiinnarnissaanut tunngavissaaruppoq.

Nunaoil A/S siusinnerusukkut akiliunneqarluni suleqataasutut ikummatissiassanut akuersissutini peqataasarpog (aningaasaliinissamik pisussaaffeqarani piginneqataalluni), kisianni taamaattoq maannakkorpiag akuersissutini ingerlatsivigineqartuni peqataanani.

Nunaoil A/S pillugu Inatsisartut inatsisaata atorunnaarsinneqarnerata kingunerisaanik Nunaoil A/S ingerlatseqatigiiffiup malittarisassaanni siunertamut aalajangersakkap allanngortinnissaanut periarfissaqalissaaq, taamaalilluni ingerlatseqatigiiffiup ingerlataqarnerni ikummatissiassanut akuersissutininut toqqaannartumik atassuteqaanngitsuni suleqataasinnaanissaa periarfissiissutigineqassalluni.

2. Siunnersuummi immikkoortut pingaarnerit

Siunnersuutigineqarpoq Nunaoil A/S pillugu Inatsisartut inatsisaat nr. 15, 7. december 2009-meersoq atorunnaarsinneqassasoq, aammalu atorunnaarsitsineq Inatsisartut inatsisaata atuutilernerata nalunaarutigineqarnerata aqaguani atuutilissasoq.

3. Pisortanut aningaasaqarnikkut allaffissornikkullu sunniutaasussat

Siunnersuut pisortanut aningaasaqarnikkut allaffissornikkullu
sunniuteqassanganneqanngilaq.

4. Inuussutissarsiortunut aningaasaqarnikkut allaffissornikkullu sunniutaasussat

Siunnersuut inuussutissarsiortunut aningaasaqarnikkut allaffissornikkullu
sunniuteqassanganneqanngilaq.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut, pinngortitamut inuillu peqqissusaannut
sunniuteqassanganneqanngilaq.

6. Innuttaasunut sunniutaasussat

Siunnersuut innuttaasunut aningaasaqarnikkut sunniuteqassanganneqanngilaq.

7. Sunniutaasussat annertuut allat

Siunnersuut allanik annertuunik sunniuteqassanganneqanngilaq.

8. Oqartussanut kattuffinnut ilaalu ilanngullugit tusarniaaneq

Siunnersuummi aalajangersakkanut ataasiakkaanut nassuiaatit

§ 1-imut

Siunnersuutigineqarpoq Nunaoil A/S pillugu Inatsisartut inatsisaat nr. 15, 7. december 2009-meersoq, Inatsisartut inatsisaanni nr. 16, 8. juni 2017-meersukkut allanngortinneqartoq, atorunnaarsinneqassasoq.

§ 2-mut

Ingerlatseqatigiiffik pillugu inatsisip immikkoortup taassuma atorunnaarsinneqarnerata kingunerisaanik Nunaoil A/S taamaallaat aktiaatileqatigiiffiit pillugit inatsisini nalinginnaasuni pineqartunut ilaatinneqalissasoq, aalajangersakkami aalajangersarneqarpoq. Tamatuma kingorna malittarisassanik allanngortitsisarneq pillugu aktiaatileqatigiiffinnut maleruagassat atuuttut malillugit ingerlatseqatigiiffiup malittarisassai allanngortinneqarsinnaalissapput, ilanngullugu ingerlatseqatigiiffiup taaguutaata allanngortinneqarnissaa.

§ 3-mut

Siunnersuutigineqarpoq Inatsisartut inatsisaat inatsisip atuutilernerata nalunaarutigineqarnerata aqaguani atuutilissasoq.